



# KATILINGBAN

Ang opisyal nga pamantalaan sa Basic Ecclesial Communities (BEC) sa parokya sa Naval

Vol 2, No. 11

website: [www.geocities.com/navalbec](http://www.geocities.com/navalbec)

Hunyo 2006



## PAMALANDONG SA EBANGHELYO

Hunyo 4, 2006 : Domingo sa Pentecostes  
Basahon: Acts. 2:1-11 / Cor. 12:3-13 / Jn. 20:19-23

### Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandog kanimo? Ngano man?

### Tema: (Basahon human sa mga paambit)

“Ayaw ikahibulong nga ako nag-ingon kaninyo nga kinahanglan magpakatawo kamo pag-usab . . . , apan wala kamo mahibalo diin kini ( ang hangin) gikan o asa kini padulong” (Juan 3:7-8). Bisan og si San Lucas misugilon sa pagdala sa Espiritu Santo sa adlaw sa Pentekostes- ang ika-kalim-an ka adlaw tapos ang Pagkabanhaw sa Ginoo – si San Juan misugilon niini sa gabii sa Pagkabanhaw. Ang matag usa kanila adunay kaugalingong paagi sa paghulagway sa kahimayaan ni Hesus. Alang kang San Juan, kining kahimayaan nahitabo sa dihang gibayaw si Hesus didto sa krus. Alang sa duruha, ang Espiritu Santo mao ang bunga sa kadaugan nga naangkon ni Cristo pinaagi sa iyang kamatayon ug pagkabanhaw. Ang pagkunsad sa Espiritu Santo dili gayod diay mahabulag gikan sa Pasko sa Pagkabanhaw. Apan nganong kinahanglan madawat sa mga tinun-an ang Espiritu Santo? Sa panlantaw ni San Lucas, kinahanglan madawat nila ang Espiritu Santo aron sila makasulti ngadto sa tanan sa tukma nilang pinulongan ug sa ingon masugdan ang misyon sa Simbahan ngadto sa tibuok kalibutan. Dili lahi ang gisulti ni San Juan, apan gisulti niya kini sa laing paagi. Ang mga apostoles didto sa lawak sa itaas. Kinandadohan ang tanang mga pultahan kay nahadlok man sila sa mga Judio. Nangahadlok sila ug ang ilang kahadlok makatakod. Nagpamati sila sa matag kasikas sa gawas sa balay. Nahadlok sila

nga dakpon. Sa kalit lang, mitungha si Hesus sa ilang taliwala: “Ang kalinaw maanaa kaninyo! Ang kalinaw maoy labi nilang gikinahanglan niining mabalak-on nga kahimtang. Nahipatik pa sa lawas ni Hesus ang mga tinun-an sa iyang pagpasakit. Mianhi siya, buhi ug mas kusgan kay sa kamatayon. Ang mga pultahan nga kinandadohan wala na mahimong babag sa iyang misyon. Dili na takna sa kinaugalingong kahadlok. Karon mao na ang panahon sa pagtugot sa Espiritu Santo sa paggun-ob sa tanang babag ug pagdala sa Simbahan ngadto sa unsay gibu-an sa Dios niini.

### Pamalandongi kini:

Imo bang gitugotan ang Espiritu Santo sa paggun-ob sa tanang babag sa ingon ikaw mamahimong usa sa mga instrumento alang sa kapadayonan sa misyon sa Simbahan?

Hunyo 11, 2006: Trinity Sunday

Basahon : Dt. 4:32-40 / Rm. 8:14-17 / Mt. 28:16-20

### Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandog kanimo? Ngano man?

### Tema: (Basahon human sa mga paambit)

Ang tanan kasaulogan nga liturhikanhon, sa pagkatinuod ang tanang Kristohanong pag-ampo, anaa gayod sa Santisima Trinidad: ngadto sa Amahan, pinaagi sa Anak, diha sa Espiritu Santo. Ang liturhikanhong kasaulogan sa Santisima Trinidad nagasukad sa Simbahan panahon ni Carlos nga emperador kaniadtong ika-walo ngadto sa ika-siyam nga siglo. Usa ka tinuyo nga Misa alang sa Santisima Trinidad nahimong inila; gani kini nagsugod na paghulip sa mga kasaulogan sa adlawng Domingo. Sa tuig 920 ang obispo sa Liege migama og tibuok han-ay sa Misa ug ang mga pag-ampo nga pagasaulogon sa matag unang Domingo human sa

Pentekostes. Ang kapiyestahan niini natukod alang sa tibuok Simbahan Romanhon kaniadtong tuig 1334.

Ang labing gamay ug nagalihok nga kahiusahan sa tawhanong kinabuhi wala diha sa usa tawo. Matag lalaki ug babaye, bisan unsa ka maut sa espiritu ug sa lawas, nabuhi tungod kay natawo man siya gikan sa panag-abot sa duha ka tawo ( babaye ug lalaki). Walay masuso nga molahutay pagpakabuhi kon walay pag-amoma ug pagkaon, buhat sa tawhanong pakiglambigit. Kon buhi man gayod kita, nabuhi kita nga bunga sa usa ka tawhanong katilingban.

Mituo kita nga gimugna kita sumala sa dagway sa Dios. Ang atong pagtan-aw sa atong kaugalingon tataw kaayo ug sa walay lunga anaa gayod sa kinabuhi diha sa katilingban. Tungod niini kinahanglan gayod kita mangita diha sa Balaang Kasulatan sa mga sugyot ug mga pagpadayag sa kinabuhi mismo sa Dios, kinabuhi nga alang ug lakip sa uban. Bisan dili gayod kita makaila sa Dios sa iyang pagka Dios mismo, ang matag ilhanan sa buhat sa Dios dinhi sa atong kalibutan magdala kanato ngadto kaniya, ang Dios nga nakiglambigit kanato.

Ang kabuhatan mismo maoy usa ka pagpadayag sa kaugalingong dagway sa Dios, ang sumpay sa iyang gugma nga lahi ra sa iyang kaugalingon. Ang mapadayonong pagpakighinabi sa Dios ngadto sa kabuhatan miabot sa iyang kinatumyan diha ni Hesus, ang Dios nga nakig-uban kanato. Kining maong Hesus gidala ngadto sa kahingpitan sa himaya sa Amahan ug ang kahingpitan sa ilang gugma gibubo kanato diha sa gasa sa Espiritu Santo.

Basin napakyas kita atubangan sa kakuti sa teyolohiya sa nangaging mga siglo nga nangita sa pagsabot sa dili matugkad nga kaladmon sa Dios, mapangahason kitang mihulma og mga hulagway sa dagway sa atong pagtuo pinaagi sa pag-ampo matag adlaw ngadto sa Amahan., pinaagi sa Anak ug sa Espiritu Santo. Sa atong pagtimaan sa atong kaugalingon sa krus gilitok nato ang ngalan sa Amahan, Anak ug Espiritu Santo. Busa misulod kita ngadto sa kinabuhi uban sa Dios pinaagi sa bunyag. Mosulod kita ngadto sa kahingpitan nianang diosnong katilingban pinaagi sa ganghaan sa kamatayon.

**Pamalandongi kini:**

Sa dihang ikaw nahimugso misulod ka sa usa ka tawhanong katilingban. Sa dihang gibunyagan ka, misulod ikaw – dili lang sa katilingban sa mga matuohon kondili – sa kinabuhi uban sa Dios: ngadto sa Amahan, pinaagi sa Anak ug diha sa Espiritu Santo. Unsa may kahulugan niining maong kamatuoran sa imong kinabuhi?

“Bulahan ang tawo nga may kahingawa sa mga kabos kay tabangan siya sa Ginoo kon anaa siya sa kalisdanan”

- Salmo 41:1

**LJC Rice Mill**  
 Sitio Lupa, Calumpang  
**& Groceries**

Ground Floor, Naval Mall

Owned & Managed by:

**RAMISES “Bong” BONGABONG**



**KATILINGBAN**  
 Ang atong mga mundo sa Dios: Eclesial, Komunita (LJC), sa parokya sa World

**TEAM MINISTRY**

*Team Moderator:* Bishop Filomeno G. Bactol, D.D.

*Team Members:*

- Fr. Marvyn A. Maceda
- Fr. Florencio Gerones
- Fr. Kenneth Hendricks
- Fr. Cornelio AMante, Jr.

*Newsletter Moderator:*

Fr. Marvyn A. Maceda

*Encoder:*

Vinna Sabroso

*Computer Specialist*

Oscar O. Borrinaga

*Business Managers:*

- Rizalito V. Curso
- Conchita Calvez

**PARISH FORMATION TEAM**

- |                  |                    |
|------------------|--------------------|
| Eudoxia Canonoy  | Reymund Icaín      |
| Linda Roldan     | Jonnell Quilaneta  |
| Necitas Casado   | Alfredo Olaer      |
| Catalina Machete | Alfredo Paghbasan  |
| Sonia Pitao      | Danny Jayubo       |
| Josephine Romero | Gualberto Tonelete |
|                  | Ramises Bongabong  |
|                  | Jorge Manco        |
|                  | Buddy Castro       |

Hunyo 18, 2006: Pangilin sa Lawas ug Dugo ni Cristo  
 Basahon : Ex. 24: 3-8 / Heb. 9: 11-15 / **Mk. 14: 12-26**

### **Human sa pagbasa sa Ebanghelyo:**

Unsa man nga pulong o mga pulong sa Ebanghelyo ang nakapatandog kanimo? Ngano man?

### **Tema:** (Basahon human sa mga paambit)

Kining maong kasaulogan nagsugod didto sa dyosesis sa Liege sa tuig 1246 binase sa mga pagpadayag ngadto kang Juliana nga taga-Cornillon. Sa tumang kahinam gidawat kini sa tibuok Oropa nga tungod niini sa tuig 1264 gisangyaw kini ngadto sa tibuok Simbahang Latino. Sukad pa sa sinugdanan gisaulog niining kapiyestahan ang lawas ug dugo sa atong Ginoo. Kining unang kahiusahan nahibalik diha sa kasaulogan human ang Ikaduhang Konsilyo Vaticano.

Ang tawo sa iyang pagka-siya lawasnon gayod. Si Hesus ug ang iyang Simbahan adunay tin-aw nga pagsabot niining maong kamatuoran diha sa mga kasaulogan nga gitawag natog mga sakramento. Ang Simbahan mao ang Lawas ni Cristo ug ang mga magtutuo mao ang mga bahin niining Lawas. Ang tinubdan ug ang kinapungkayan sa tanang kinabuhing Simbahanon gituohan nga mao ang kasaulogan sa Eyukaristiya diin ang Lawas ni Cristo miambit sa ilang pagka-sila.

Niining Domingoha gisaulog nato ang atong pagka-kita isip Lawas ni Cristo. Niining Domingoha gibutyag nato ang atong pagtuo nga ang makabuhi ug ang makalimang dugo nga midagayday dinhi kanato mao ang kinabuhi mismo ni Cristo. Niining Domingoha gipunting nato ang atong pagtagad ngadto sa simbolo nga maoy nakapahimong posible sa tanang ubang mga simbolo.

Ang yutan-ong pinulongan sa lawas ug dugo nagpuno sa Balaang Kasulatan. Apan kini ra usab sila ang misangyaw nga ang pagbubo sa dugo gihimo alang sa kaaliman sa katawhan sa Dios. Ang unod, ang dugo, ang pan ug ang bino maoy mga bunga sa mga paaging magun-obon nga naghatod kanila ngadto sa tawhanong talad kan-anan isip pagkaon nga maoy mag-alima sa usa ka banay. Si Cristo mitugot sa iyang kaugalingon sa pagsinati nianang maong mga proseso nga maoy naghatod

kaniya ngadto sa talad kan-anan sa tawhanong banay isip pagkaon ug mainom. Niining paagiha nausab ang nangaon ngadto sa ilang gikaon. Nangahimo silang mga “Cristo”.

### **Pamalandongi kini:**

1. Tinuod ang atong Ginoo, si Jesucristo, nagpabilin uban kanato diha sa Santos nga Sakramento sa Altar. Ikaw sa imong bahin nagpabilin ba kanunay diha kaniya?
2. Sa imong pagkalawat kaniya, imo bang gipuyan kanunay ang imong pagka-laing “Cristo” alang sa imong isigkatawo? Sa imong isigkamagtutuo?

Hunyo 25, 2006: Ika-12 nga Domingo “Sulod sa Tuig”  
 Basahon : Jb. 38:1-11 / 2Cor. 5:14-17 / **Mk. 4:35-41**

### **Human sa pagbasa sa Ebanghelyo:**

Unsa man nga pulong o mga pulong sa Ebanghelyo ang nakapatandog kanimo? Ngano man?

### **Tema:** (Basahon human sa mga paambit)

Taliwala sa unos giharong ni Hesus ang nagpungasi nga mga balod sa dagat. Pinaagig usa ka pulong gibadlong niya ang hangin ug ang mga balod. Ug giawhag niya ang iyang mga tinun-an paghupot og mas dakong pagtuo. Dili lang kini usa ka maanindot nga sugilanon nga gisaysay aron pasaligan ang mga mahadlok. Maayong balita kini alang sa matag usa nga human misakay uban ni Hesus nakadiskobre diha sa unos nga ang magtutudlo daw nahikatulog lang.

Si Hesus ang mipasiugda sa maong pagtabok ug uban sa iyang mga tinun-an milawig sila paingon sa silangang lapyahan sa lanaw. Tapos sa makapoy nga adlaw, nahikatulog siya ug nagpabiling nahinanok bisan pa man taliwala sa makusog nga unos hangtod nga ang iyang mga tinun-an nagkabuang na. Sa usa niana ka Biyernes, siya usab daw lamyon diha sa kinamatayong paghikatulog ug ang pagtuo sa iyang mga higala magmabalhinon. Didto sa sakayan nataranta nga mipukaw kaninya ang mga tinun-an hangtod nga nahigmata siya. Ug daw naghingilin siyag usa ka demonyo, iyang gihadlok ang mga gahom sa kamatayon nga mihapak sa sakayan. Sa kalit lang nalinaw ang lanaw

apan ang ilang mga kasingkasing nagpabiling gubot. Sa pagpalurang sa unos, si Hesus nakapaaghat ug usa ka pangutana: Kinsa man diay kini siya? "Taliwala sa ilang kalisdanan gisangpit nila ang Ginoo, ug giluwat niya sila sa ilang mga pag-antos. Gipahunong niya ang unos, ug nangahilom ang mga balod" (Salmo 107:28-29).

Sa walay pagduhaduha si San Marcos nakigsulti ngadto sa usa ka linutos ug nahadlok nga Simbahan. Ug iya silang gilig-on sa ilang pagtuo. Unsaon man nila paglahutay gawas kon moduol sila kang Cristo kinsa mipatuo ang hangin ug ang balod sa dagat? Kanunayng anaa siya sa sakayan bisan kon daw nahikatulog siya. Kon mahiabot ang unos sa atong kinabuhi kinahanglang magmatuohon kita bisan pa man sa tanan.

### Pamalandongi kini:

Panahon sa kalisdanan, kang kinsa ka man moduol? Kang kinsa ka man mosangpit?



## Gitik-gitik sa Kinabuhi

*Sa usa ka amateur singing contest.*

1st contestant: Ang akong kantahon "Dahong Laya".

2nd contestant: Ang akong kantahon "The Falling Leaves".

3rd contestant: Dili na ko mokanta!

Judge: Ngano man?

3rd contestant: Manilhig na lang ko kay daghan na'g sagbot!

-oOo-

Elmo: Dok, ano ang gagawin ko para bumuti ako?

Dok: Mag diyeta ka para mabawasan ang taba mo. Tumigil ka sa paninigarilyo at pag-inom. Tapos, pumunta ka sa optiko.

Elmo: Optiko? Bakit ho?

Dok: Para mabasa mo ang karatula sa pinto. Arkitekto ako, e. 'Yong doktor, nasa first floor.

-oOo-

*Didto sa usa nga religion class:*

Katekista: Unsay unang buhaton aron mapasaylo ang atong mga sala?

Bata: Una sa tanan, magpakasala una ta!

## BEC ACTIVITIES

June 2006

### CLUSTER FELLOWSHIP

**Brgy. Ilaya / Brgy. Smo. Rosario**

June 3, 2006 (1st Saturday)

Cathedral Church

7:30 PM – 10:00 PM

### PAROCHIAL FELLOWSHIP

**Brgy. Haguichikan Chapel**

June 17 ( 3<sup>rd</sup> Saturday)

8:00 AM. - 3:00 PM.

**Sitio Lomboy Chapel**

June 18 (3<sup>rd</sup> Sunday )

8:00 AM. - 3:00 PM.

### BEC ANNIVERSARY

June 7, 2006 ( Miyerkules)

**BEC Libtong Gamay**

June 8, 2006 ( Huwebes )

**BEC Lower Anas**

June 19, 2006 ( Lunes )

**BEC Sitio Lupa**

June 23, 2006 ( Biyernes )

**BEC Atipolo Centro "Potat"**

"Ayaw paglipay kon mahiagom sa katalagman ang imong kaaway. Masayran sa Ginoo kon magmalipayon ka ug dili siya gusto niini. Tingalig dili niya silotan ang imong kaaway"

Panultihon 24:17

## NAVAL COUNTRY INN

*"Your home away from home"*

&

## NAVAL TOWN CENTER